

## Cussagl da cumün

Protocol nr. 20 da ls sezzüda dals 12 schner 2010

### **Hotel Paradies, sculpturas cun inscripziun d'indicaziun**

L'hotel Paradies survain il permiss per plazzar trais sculpturas cun inscripziun d'indicaziun e cul logo da l'hotel. Üna vain missa a l'entrada pro la via vers Ardez, üna a la fin da la piazza da parcar visavi a la chasa da persunal ed üna pro l'entrada da l'hotel. Implü fana la dumonda per montar tschinch glüms da via chi inglümieschan l'entrada davent da la via d'Ardez. Al Cussagl para quai exagerà ed el decida da conceder il permiss per montar trais glüms.

### **Cusgliaziun da construcziun, cunvegna**

Il schef da fabrica preschainta al Cussagl la proposta per üna cunvegna per quai chi riguarda la cusgliaziun da construcziun. Tal es gnü elavurà da la cumischiun da fabrica insembel cul cusgliader. Quist palperi dess esser ün manual per optimar la collavuraziun tanter l'istanza da fabrica e'l cusgliader.

### **Biblioteca, collavuraturas**

Duonn'Elsina Collenberg ha demischiunà sco manadra da la biblioteca. Sün l'inserat i'l mas-chalch sun entradas duos annunzchas. La cusgliera respunsabla ha discus la chosa cullas bibliotecaras e propuona dad ingaschar a tuottas duos persunas, quai causa ch'üna da las bibliotecaras ha manzunà ch'ella haja l'intenziun da demischiunar i'l decuors da quist on. In vista a quista situaziun decida il Cussagl dad ingaschar a las interessentas Solidea Bazzell e Cilgia Florineth. Ellas frequentan il cuors fundamental d'ürant quist on resp. l'on chi vain.

Il Cussagl ingrazcha a duonn'Elsina pel grond ingaschamaint a favur da la biblioteca e giavüscha a las novas elettas bler plaschair e satisfaciun in lur lavur.

### **Mas-chalch**

Las infuormaziuns chi vegnan publicadas i'l mas-chalch nu satisfan adüna. L'organ da publicaziun vain dovrà massa pac da las societats. Il capo propuona da collavurar cun Ftan Turissem ed integrar lura eir amo otras publicaziuns sco per ex. il "Novisco" da la scoula e las infuormaziuns periodicas da la baselgia "La Punt". In quist möd as pudessa eir integrar infuormaziuns pels giasts e persunas da seguondas abitaziuns. Il Cussagl sustegna l'idea ed in-cumbenzescha al capo da trattar culs respunsabels dal turissem.

Il capo: sig. Reto Pedotti

L'actuar: sig. Andri Florineth

publichà als 19/01/2010